

## ◎二十空 《三藏法數》初 《般若經》

- 一、內空。即內六入。謂眼空，無我無我所等。
- 二、外空。即外六入。謂色空，無我無我所等。
- 三、內外空。合內外入。謂十二入中無我無我所等。
- 四、空空。以空破前三空，謂三空亦空也。
- 五、大空。即十方空，不可思量故，一切處有故。
- 六、勝義空。亦名第一義空，不可得無受無著故。
- 七、有為空。因緣和合生，無自性故。
- 八、無為空。若離有為，無為不可得故。
- 九、畢竟空。破一切法令無遺餘，亦無虛實相待故。
- 十、無際空。亦名無始空，一切諸法無初際故。
- 十一、散空。五陰離散，人不可得故。
- 十二、無變異空。謂一切法如如不變，了不可得故。
- 十三、本性空。謂一切法本性清淨，離性離相故。
- 十四、自相空。謂一切法虛幻不實，了無自相故。
- 十五、共相空。謂一切諸法彼此之相，本來空寂故。
- 十六、一切法空。一切法皆由心生，無自體故。
- 十七、不可得空。一切法乃至無餘涅槃，皆不可得故。
- 十八、無性空。亦名無法空。謂法既滅已，是滅無故。

十九、自性空。亦名有法空。謂諸法因緣故有，實性無故。

二十、無自性空。亦名無法有法空。合無法有法皆不可得故。